

AÑ SANTIAGO PO'CARTA SANTIAGO

*Atto Santiago quellcan carta allohuenacop ñeññ
atta parratse'tyets allemeñ*

¹ Masheñneshacha' ñaña nochaneshacha' ñeññes Israel puechemeresha' po'mrenñes, ñeññ charrasheña puechena epsheña ñeññna po'mreneñ sepene'ña sa, ñeññes atta parratse'tyets allemeñ anetso'mar. Na Santiagon sequellquëne'ña añ carta ñeññen torretsa Yomporecop ama't ñaña Puechemerecop Jesucristo ñeññ Yeparthseshar yepen. Te'pa' o'ch nehuomcha'tas allohuenes añ necartot.

Attoch ya'huanten allohuen topateñets

² Ñaña te'pa' o'ch masheñneshacha' ñaña nochaneshacha' notas, ñerra'm esempo huaponasa pa'namen topateñetspa' sapa' socshepa'ch nanac. ³ Tarro'mar sapa' señoteñ ñerra'm cho huaponaya topateñets, ñeñtpa' añecopcha' huapa attoch topatenya' ñerra'm po'ñochte' yame'ñena. Allochñapa' attoch chocma es ya'huanten. ⁴ E'ñe pocte' allo'nepa'ch sesen ahuanta'huanmue' allohuen topateñets, allochñapa' attoch poctacma huomenc seña' seyočher Yomporecop, ñaña attoch amach es sepallteno ama't mamesha atto same'ñeña Yompor.

Yomporpa' chocma mueneñ o'ch es eñotatey

5 Ñerra'm eseshaste' ama e'ñeye' eñotenaye ñeñt cohuen enten Yomporpa' sapa' añcha'ña senam Yompor, ñapa' chocmach es eñotatey, tarro'mar ñapa' e'ñech pocsheñesha' es apueney allohueneys, amachña ñeñtapa' cha che'ptare'tye. **6** Tarraña ñerra'm esempo es senamueñ Yomporpa' e'ñech seyemteñot es sanam. Amach cha se'charrtatsto seyoçhro ama't mamesha. Tarro'mar ñeñt chocma echarrtetsa pueyoçhropa' amach e'ñeye' yemtenano Yompor ñeñto'marña ñeñt atet petsapa'chach ottena ñerra'mrrate' oñ pue'mo'yer ñeñt alleñateñ anen morr. **7-8** Ñeñt atet petsapa' eñochetepa' po'ñoc'hpa' amach es ape Yompor, tarro'mar ñeñt atet petsapa' amach pañraye' cotape'cheno. Atet ñerra'm te'pa' ñato' po'poñcha' cotape'chen, ñato' tsapatñapa' o'chcho' cotape'chenan po'poñ. Ñeñtacheñerpa' chocmach atet pa'yena.

9 Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar allempo Yomporpa' atetcha' entenes ñerra'mrrate' ñeñtis nanac sherberts. **10** Ñama añ masheñer ñeñt echene' shonte' po'çllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeñt eçllayoret ñeñtpa' mamecpa atet pena ñerra'mrrate' ta'te' puerorer ñeñt nanac auyaña. **11** Tarro'mar ñeñt ror atetpa' ñerra'm o'ch huapa'muena atsne', ñerra'm o'ch atserrtapa' chach a'uyatoñña pue'chor, aña puerorerñapa' o'ch shorna'tua; ñeñtña atto cohuentenapa' o'ch huañ. E'ñe atet penaña ñeñt

ečllayoreč. E'ñe puechecma'teñotpa' huañerrcha' ñaňma.

E'ñe yañeña yemnenñoč topateney oneñet

¹² Nanac cosheñtso'tsen allohuen ñeñt ahuantene' ora pa'namen topateñets, tarro'mar ñerra'm esempo ahuanta'huan ora topateñetspa' nanaccha' cohuen entuer Yompor. Allempopa' aphuercha' Yompor ñeñtcha' atarr coshaterre' alloch ñapa' corretsach tayočeñ ama't errponaňohuen. Ñeñtpa' aña o'patatena allohuen ñeñt morrentenaya ña. ¹³ Ñaňma te'pa' o'ch notas, ñerra'm esempo e'ñe sañeña semnenñoč o'ch sepa ñeñt ama cohuenayayepa' amach sotatsto, "aňpa' Yomporte' o' topaten." Tarro'mar Yomporpa' ama esesha' topatenaye attoch ñapa' o'ch pa ñaňma ñeñt ama cohuenayaye. Ñeñt'o'marña ñapa'čho' amach errotenoč topatye yamá. ¹⁴ Elloňa aňmapa' e'ñe sañeña semneññoč attoch huaponasa topateñets o'ch sepa ñeñt ama cohuenayaye. ¹⁵ Tarro'mar ñerra'm esempo es yemnatse'tyen yejočhro, ñerra'm o'chčho' yeþa ateþpa', ñeñtpa' ñeñtña yo'chñar yepen. Ñaňma ñerra'm čhocma allo'na yesen pa'nmue' ñeñt ama cohuenayayepa' e'ñe yo'chñaročpa' o'ch yechenquërra.

¹⁶ Masheñneshacha' ñaňma nočhaneshacha' e'ñe nemorrenteñočespa' o'ch alla noterrserr, amach sepantatsche sañeña. Po'ñočhpa' ama Yomporeye' yetpatenaye attoch yeþa' ñeñt ama cohuenayaye. ¹⁷ Yomporpa' e'ñe cohuenare' es apueney ñeñtcha' allo'na yeyenpuene' ñeñtara ñeñt mueñennay pue'ntañoč. Ñaňma ñeñtara Yompor ñeñt yečhcate'

allohuen ñeñ̄t yečhoyo'tam̄pene' pue'ntañoč. Tarraña erročeno e'ñe puechope'cheñočpa' amach tama čhoyo'tam̄penye. Tarraña Paretspa' ama atteye' peno. Ñapa' amach ellopa' alla a'po'poňetačperrye ñeñ̄t atet muenateney.

¹⁸ Allempo yame'ñerrñaña po'ñoň ñeñ̄t e'ñe po'ñočh atet oteneý ñeshočñapa' ye'ñalleterra atet ñerra'mrrate' e'ñe puechemerey ñeñ̄t e'ñe po'moter pen ñeñ̄t anareč e'ñe ñocop. Tarro'mar ñeñ̄tpa' atet muenen ña.

Añpa' ñeñ̄tcha' atet yesherbe' Yompor e'ñe co-huen

¹⁹ Ñeñ̄to'marña masheñneshacha' ñam̄a nočhaneshacha' e'ñe nemorrenteñoespa' o'ch neñotaterrserr po'poň. Sa allohuenes aň poctetsa čhocmach pocte' señch o'ch se'mňoch cohuen ama't erra'tsena ñeñ̄tcha' serrpare'tatets. Añcha'ña čhocmach serrmuen señoň. Ñam̄a amach e'ñe attota sa'tsrre'ma'yeno, čchochña ñanom es sočtage'ch ñato' atsrre'močhente' ñeñ̄t atet otensem, ñato' amate'. ²⁰ Tarro'mar e'ñe ya'tsrre'mueñočpa' amach erročenot yetsotoňa ñeñ̄t atet pocte' enten Yompor. ²¹ Ñeñ̄to'marña sapa' o'ch sequečhpahuerr sosya'tsaň ora allohuen ñeñ̄t shonte' sepa'yen ñeñ̄t ama pocteyaye Yomporecop. Añcha'ña sapa' o'ch sagapoň Yompor po'ñoň e'ñe señmaňeshha'. Tarro'mar ñerra'm o'ch čhaponyaya Yompor po'ñoň e'ñe yejočhropa' ñeñ̄tpa' ñeñ̄tcha' ya'queshpaterre' esempohuaňen yecamquëñoč.

²² Ñam̄a sapa' amach e'ñe orrena se'matstoňe Yompor po'ñoň, čchochña sorrtatyesňa ñeñ̄t atet

oteney. Tarro'mar ñeñt e'ñe orrena e'muene' Yompor po'ñoñpa' ñeñtpa' ñañeñach shequëtsa tarro'mar čhaťe' otenapañ ñato' ñeñtate' poctetsa ñocop attoch queshperra. ²³ Ñamá ñeñt atet petsapa' čhach ottena ñerra'mrrate' ñeñt atta co-huetsa rerpo. ²⁴ Añecpach cohuela o'ch entan errotenente' orrtena pa'clloyot. O'chña entuan ñeñt atet orrtenapa' allempoñapa' o'ch ahuerr. Allem-poña čherr a'yopa' o'ch alla puesuerran ñeñt atet orrtena pa'clloyot. ²⁵ Tarraña ñeñtña e'ñe pomnenñoñ ma'yočhrenaya Yompor po'ñoñ ñeñt e'ñe cohuela atet oteneypa' ñeñtñapa' ama atteye' pero ñeñt atet pena ñeñt e'ñe orrena e'muene' Yompor po'ñoñ ñeñt atta puesene' ñeñt atet oteneypa' Yompor. Añcha'ña čhocomach orrtatyenán ñeñt atet oten Yompor po'ñoñ. Elloña ñeñt atet petsapa' nanaccha' cosheñtso'tsen.

²⁶ Ñerra'm esesha' otets ñapa' nanaco' cohuela sherbenan Yompor, tarraña ñerra'm ña ama anenano po'ñoñpa' ñeñtpa' ñañeñach shequëtsa. Tarro'mar ñerra'm atterach yeñosatse'tyenpa' amach po'ñočhaye' yesherbeñ Yompor. ²⁷ Añña e'ñe pocte' enten Yompor Apa ñeñtcha' atet yesherbeñ ña e'ñe cohuela: O'ch yeyenpueñ huocchaneshachačhno, ñamá rrečorrnaneshá' ñerra'm esempo es mueročhtatenahuet. Ñamá yapa' amach ya'sosyatatsto yechets ñeñt atet pats'e'tyena ñeñt ama ame'ñetso arr patsro.

2

Atto amach puesheña'ttsa cohuela yentatsto

¹ Masheñneshacha' ñama nochaneshacha' te'pa' o'ch noterrserr po'poñ. Sa e'ñe same'ñeñot Yeparthseshar Jesucristo ñeñt e'ñe cochneshare' orrtatetspa' amach pusesheña'ttsa e'ñe cohuen sentatsto. Sapa' e'ñech cohuen senteñ allohuenacheñenesha'. ²⁻³ Ñato' sa errotenopa' o'ch sapchenapalallohuenes Yompor pa'pacillo. Allempona sapchenapa' ñato' o'ch huapa pusesheñiarr ñeñt chorrenaya ñeñt nanac cohuen, ñeñt nene' anillo orotllellen. Ñato' ñapa' e'ñech cohuen sagap o'chcho' sotap: "Panorros arr allame'tets e'ñe cohueno." Ñato' e'ñech allempocma o'ch huapa ñama ñeñt atarr huocchañ ñeñt cha shetsre'she'muen pa'shtam. Ñato' ñeñtñapa' chach sotaþ: "Papa' alla þatomos tarronet, amapa' alla þanorros patso." ⁴ Tarraña ñerra'm atet sepenapa' ñeñtpa' amach allohuenacmaye' cohuen sentanneno. Ñama chach sottena ñerra'mrrate' sañeña eñoteñe' ñeñtacheñer nanac sherberts. Tarraña ñerra'm atet yepenapa' ñeñtpa' amach cohuenaye' yoctape'cheno. ⁵ Masheñneshacha' ñama nochaneshacha' e'ñe nemorrenteñot te'pa' nemneñ o'ch se'mñoten ñeñtcha' atet notas. Elloña Yomporpa' añña nanac muenen o'ch acrerran allohuen ñeñt nanac huocchañetets añ patsro, attoch e'ñe pame'ñeñotet ñetpa' echerretcha' esocmañen Yomporeshot. Esempohuañenñapa' o'ch aguerret ñama ñeñt o'patatenanet Yompor all amcha'tarettena pue'ntaño. Ñama ñeñt o'patatenya allohueney ñeñtay morrentenaya ña. ⁶ Tarraña sañapa' chaña semneñ o'ch sepencach

ñeñ̄t huocchañetets. Sapa' ama't señoteñeña ñeñ̄t nanac eçllayoretpa' ñeñ̄tña es aprratam̄psañ, amapa' o'ch temantas am̄cha'taretesho. ⁷ Ñama ama't señoteñeña ñeñ̄t nanac eçllayoretpa' ñeñ̄tña nanac achm̄are'tene' Cristo pa'so'cheñ ñeñ̄tara ñeñ̄t nanac am̄cha'na'tpo' yenten ya ñeñ̄tey Cristona'tarey.

⁸ Ñerra'm çhocma semorrentannenapa' allempopa' o'ch setsotua añ ñoñets ñeñ̄t atet anaret Yompor po'ñoño ahuatoteñ, ñeñ̄tpa' atet oten: "O'ch atarr cohuen pemuerya pamo'ts e'ñie atet atarr pemorrentena pañeña." Añ ñoñets ñeñ̄tña nanac sherbets, ello metana'tuenan po'poñeçhno. Ñerra'm atetcha' seþapa' allempopa' amach es sepallteno Yomporecop. ⁹ Tarraña ñerra'm sapa' e'ñie puesheña'ttsa semorrentenapa' ñeñ̄tpa' allotña çhocma yo'chña'ten. Ñama ñerra'm atet yepenapa' nanaccha' yeyoren yo'chñar, tarro'mar ama atet yepeno ñeñ̄t atet oteneys Yompor po'ñoñ ñeñ̄t atet anaret. ¹⁰ Ñama ama't e'ñie yeychatset allohuen Yompor po'ñoñ ñeñ̄t atet anaretña', ñerra'm paterrñapa' ama atteye' yepeñepa' Yomporñapa' o'ch enteneys ñerra'mrrate' o' ora yepanta'huoñ. ¹¹ Añ Yompor ñeñ̄t yotene' "amach sechtapretatsto taporets" ñeñ̄tara Yompor ñeñ̄t yotene' ñama "amach semtsanna'tatsto." Ñeñ̄to'marña ama't ama yechtapretatsto taporetsña' ñerra'm erroñenopa' machayoña yemtseacheñ Yomporñapa' o'ch enteneys ñerra'mrrate' o' ora yaþpare'tuoñ po'ñoñ ñeñ̄t atet anaret. ¹² Ñeñ̄to'marña

sapa' chocmach seyerpa atto esempohuañen Yomporpa' eñotatysesuerreycha' e'ñe errotencha' entyesuerrey. Tarro'mar ñato' yepena ama't ñeñt atet oteneý te' Cristo po'ñoñ ñeñt atet anaret ñeñt ama amuerochtatañeyaye. Ñeñto'marña sapa' e'ñe señoteñot atetpa' ama't errotena señenpa' e'ñepa'chña cohuenare' señosyen. Ñama e'ñe señoteñot atetpa' e'ñepa'ch cohuenare' es sorrtatyen. ¹³ Ñama sapa' señochepa'ch ñeñt ama morrentenayo te' pamo'tspa' ñapa'cho'ña esempohuañen allempoch eñotatysesuerrey Yompor e'ñe errotencha' entyesuerrey, ñapa'cho'ña allempopa' amach eseshaye' morrenterrayo. Añña ñeñt morrentenaya te' pamo'tspa' esempohuañenña allempoch eñotatysesuerrey Yompor e'ñe errotencha' entyesuerrey, allempoña ñapa' nanaccha' amueraretterra.

*Ñerra'm po'ñoçhyame'ñenapa'chochyorrtat ñama
ñeñt cohuentetsa ñocop*

¹⁴ Masheñneshacha' ñama nochaneshacha' te'pa' o'ch notas. Po'ñoçh ama sherbenoña añacheñer ñeñt otets ñapa' ame'ñeno', tarraña ñerra'm ama orrtatenano ñeñt cohuentetsa Yomporecop. Ñeñtñaacheñer atetpa' amach po'ñoçhaye' ame'ñeno. Amachca'ye a'queshpatereña ñeñt atto oten e'ñe orrena ñapa' ame'ñeno'. ¹⁵ Ñehua, ñato' o'ch netma'ntacha atet. Ñerra'm puesheñarr masheñ, amapa' yoçh palltenet ñeñtcha' chorret, amapa' ñeñtcha' rret allempo, ¹⁶ tarraña ñerra'm sapa' atta sotyeñ: "Ahua'ta, Yomporepa'chña pa'nataya. Eñalletepa' ñeñtcha' pechorra, ñama

ñeñ̄tcha' perra'." Tarraña ñerra'm amaña es sape ñeñ̄t palltenapa' atetpa' amaca'ye čhoye' es sesherbeno. ¹⁷ Neñ̄tpa' atet pena ñama ñerra'm esempo atta yoten, "napa' name'ñena", tarraña ñerra'm ama yorrtateno ñeñ̄t cohuentetsa Yomporecoppa', ñeñ̄tña atto yoten, napa' name'ñenapa' amach es sherbeno. Chach yottena ñerra'mrrate' o' huañerr atto yame'ñena.

¹⁸ Ñato' o'ch netma'ntacha atet. Ñato' pueheñarrpa' o'ch otan po'psheñeñ: "Papa' e'ño' peyemteññaña ñeñ̄t atet oteneY Yompor po'ñoñ, tarraña amaña porrtatyenoña ñeñ̄t atet oteneY Yompor po'ñoñ. Tarraña napa' e'ñe neþohuen ñeñ̄t cohuentetsa Yomporecop. Ñehua, ¿erra'tsenoþeyte'ña e'ñe pocte' enten Yompor?" Ñehua, te'pa' o'ch notap ñeñ̄tep atet otets: Po'ñoch ñerra'm ama yepeno ñeñ̄t cohuentetsa Yomporecoppa' amach erroþenoþ yeñotache po'psheñeñ ñato' po'ñochte' yeþemteññaña Yompor po'ñoñ. Tarro'mar ñerra'm po'ñoch yame'ñenapa' čhocmach yorrtat ñama ñeñ̄t cohuentetsa Yomporecop. ¹⁹ Ñama þapa' peyemteñoþpa' peñoteñ Yomporpa' e'ñe paþrra. Ñehua, ñeñ̄tpa' e'ñe pocte' atet, tarraña oneñetpa'cho'ña eñotenan ñama atet. Tarraña ñapa' ama't eñotenaneñña Yomporpa' ama't e'ñe paþrra, tarraña po'yorñoþach eñoteñ, tarro'mar ñapa' eñotena amach queshperro. ²⁰ Te' þapa' amate' peñoteña'. Chote' pemneñ o'ch neñotataþ atto ñerra'm ama yepeno ñeñ̄t cohuentetsa Yomporecoppa' ama't yoteneñ yame'ñena e'ñech orrena atet yoten. ²¹ Ñehua, Yomporpa' e'ñe pocte'

entan ahuať yataň Abraham allempo muene' muetsaneň puechemer Isaac Yomporecop,* tarro'mar ñapa' aň orrtaten ñeñt̄ cohuen enten Yompor. **22** Ñapa' e'ñe pocte' entan Abraham tarro'mar e'ñe pueyemteñočpa' orrtatuan ora ñeñt̄ atet och Yompor. Ñeñt̄'marña yeñoteň Abrahampa' e'ñe poctacma ame'ñaneť Yompor. **23** Allempo atet pečpa' attotňa e'ñe etsotuan Yompor po'ñoň ñeñt̄ atet aquellcareň ahuatoteň Génesis, ñeñt̄pa' atet oten: "Abrahampa' nanac yemtana Yompor, ñeñt̄'marña e'ñe pueyemteñoča Yomporñapa' e'ñe pocte' eñcheť. Ñeñt̄'mar Abrahampa' atet ocheteť, aňmapa' ñeñt̄ e'ñe parro yemtena epuet Yompor."

24 Ñeñt̄'mar yeñoteň Yomporpa' e'ñech pocte' enteney ñerra'm esempo yorrtatyeyňaň ñeñt̄ cohuentetsa ñocop. Ama't errpon yotatset yapa' e'ñe cohuen yame'ňena tarraňa ñerra'm ama yeþohueno ñeñt̄ atet muenen ñapa' amach errošenot pocte' entyeňa Yompor. **25** Tarro'mar ama't Yomporpa' e'ñe pocte' entan ahuať coyanesha' ñeñt̄ pa'so'cheň Rahab, ama't ñapa' allempo þa ñeñt̄ e'ñe pocte' ent Yompor ñocop. Ama't ñeñt̄ coyanesha'pa' nanac ecañoreshať, tarraňa ñapa' e'ñe añoča pocte' eñch Yompor atto ñapa' agapan e'ñe cohuen pa'pacllo ñeñt̄ mueňa ahuať Josué ñeñt̄cha' entenaya' ñanom

* **2:21** Ñehua, ahuať Yomporpa' ahuo't otan Abraham muetsaneňa'to' puechemer ñocop. Tarraňa ñapa' aňecpa atet och attoch topach ñato' po'ñočhte' ame'ňena. Ñeñt̄'marña Abrahampa' autsa muetsayeň puechemer Yomporecop, tarraňa ellopa' ama mueňache Yompor.

pats. Allotpa' ñañma ahuo't gaterranet po'poñ toñ allcha' oñerret attoch ama rromuerraneto allo'marnesha' ñeñt e'moñe'tenahuet. E'ñe atet puepeñota Yomporñapa' e'ñe pochte' eñch e'ñe attecma ñerra'm Abraham. ²⁶ Ñeñto'marña te'pa' yeñoteñ ama't errpon yotatset yapa' e'ñe cohuen yame'ñena, tarraña ñerra'm ama yorrtateno ñeñt poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeñtpa' o' sa'nem puecamquëñ tarro'mar ñerra'm ñeñto' o' yerromapa' añ yechetspa' amach es sherberre'te.

3

E'ñe yeñosatse'teñoña nanac yochña'ten Yomporecop

¹ Masheñneshacha' ñañma nochaneshacha' te'pa' o'ch notas po'poñ. Ama pocteyaye o'ch sechen shonte' ñeñt muenets o'ch cotape'chaten ñeñt cohuentetsa Yomporecop. Tarro'mar señoteñ ñeñtey cotape'chatets cohuen Yomporecoppa' ello nanaccha' yoroñcheno'tseney ñerra'm esempo yepena ñeñt ama cohuenayaye tarro'mar Yomporpa' amach pocteye' enteny'e ama't e'ñe mamesha. ² Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teñoña po'ñoñchpa' e'ñech cohuen cotape'chen, ñañma ñeñt atetacheñpa' e'ñech eñoteñ attoch huenatan ora ñeñt atet muenatse'tyen yechets. ³ Atet pena ñañma cahuall. Ñerra'm echenan attoch

yame'ñacha, E'ñe puenamotpa' esheccha' yanem all yesechateñ. E'ñe puenamotpa' o'ch yame'ñacha ora pue'mocrohuen. ⁴ Ñato' o'ch netma'ntacha ñaña ñeñt atet pena bote ñeñt chope'chets oño. Ñehua, botepa' ama'tcha' nanac añecmuen noñtpa' e'ñe puepopaþotpa' o'ch aneñet all sechateñ pamo'mte'. Ñaña ama'tcha' puepopaþpa' añetollpach, ñaña ama't morrpa' mueneñeñcha' o'ch anem a'yenet allenet ama yesechateñ, e'ñe puepopaþotpa' o'ch e'ñe cohuen aneñet allenet sechateñ pamo'mte'. ⁵⁻⁶ Atet pena ñaña yenam. Yenampa' ama't añetolla yechetspa' atarrcha' pa'namen esocmañen yeñosyen allot. Ñaña ñeñt atto yeñosatse'ten sosey e'ñe yenamotpa' ñeñtpa' atet pena ñerra'mrrate'tso'. Ñehua, tso'pa' ama'tcha' añetolla ya'torapa' mameshapa' o'ch epa'hua erracmañen puenta'mar, allotpa' o'ch a'poyuonay ama't ora ñeñt nanac yemorrentena. Ñeñtpa' atet pena ñaña eñosatse'teñets. Eñosatse'teñetspa' ama'tcha' mamesha yeñosatse'tpa' mameshapa' o'ch epa'hua erracmañen. Allempoñapa' o'ch čha a'huañerran ñeñt cohuentetsa Yomporecop. Tarro'mar ñeñt atto yeñosatse'tyenpa' allot huena esocmañen sosya'tsañechno ñeñt aña patsro'tsen. Ñaña ñeñtpa' a'sosyatennay ora allohuen yoctapñia. Ñaña allohuen eñosatse'teñetspa' arrot huena e'ñe oneñet pa'netsrot, allara coñcha'puetso all parraren tso' erraparen. Ñeñtcha' a'sosyatene' ora allohuen ñeñt atet yocrrrena arr patsro. ⁷ Ñehua, allohueneyacheñeyapa' e'ñe pomnaren

yeþohueñ allohuen berrochno, ñaña oþeþhno, ñaña allohuen shechpechno, ñaña ama't ñeñt yeþha'yetsa oño'mar. Ora añaechnopa' e'ñe pomnaren yeþohueñ. ⁸ Tarraña atto yeñosatse'tyen yenamotpa' ama esesha' pomnaren penaye. Tarro'mar atto yeñosatse'tenpa' amate' errotenoþ yeunache, ñeñto'marña chocmach yeñosatse'tyen. Ñeñto'marña yeñosatse'teñapa' e'ñe atet pena ñerra'mrrate' shechep ñeñt nanac amtsañ. Shechep amtsañpa' ñerra'm cho aþhay mameshapa' o'ch muetsay. ⁹ Ñama añ ñeñtara yenamotpa' ñato' errotenopa' o'ch ya'ye'chochtatoñ Yompor ñeñt Yeparsheshar yepen. Tarraña errotenopa' ñeñtara añ yenamotpa' ñato' o'ch yesasare'ch yamo'ts ñeñtara ñeñt yeþhcat Yompor ñeñt puetma'ntatara atet ñerra'm ña. ¹⁰ Ñeñto'marña masheñneschacha' ñama noðhaneshacha' sapa' amach atet seþatsto tarro'mar ama pocveyaye e'ñe yenamotpa' allot yenamateññañ yamo'ts Yompor pa'nateña, ñato' elloñapa' o'chcho' alla yesasare'ter yamo'ts ñeñtara añ yenamot. Sapa' amach atet seþatsto tarro'mar po'poñ Yompor pueyeþhcatar, ñeñtpa' ama atteye' þanneneto. ¹¹ Ñato' o'ch netma'ntacha atet: Ama't sapa' señoteñ ñerra'm erroþ poten oñ e'ñe cohuenpa' amach errotenoþ poto ñama all oñ ñeñt cha rreno'sen. ¹² Ñama masheñneschacha' ñama noðhaneshacha' ama't sapa' e'ñe señotueñ, ñerra'm yenare't poporrpa' amach pue'mer þanoña ñama parte allempo me'ten, amapa' ñerra'm yenare't

ompa' amach pue'mer panoña ñaña poporr.* Ñaña ellopa' e'ñe señotueñ, ñerra'm erroñ poten oñ e'ñe cohuenga' amach erroñenoñ poto ñaña all oñ ñeñt cha poserrsastena. Ñeñto'marña yeñoteñ yocoppa' ama pocteyaye o'ch yorrtat ñeñt epa ñeñtara yenamot. Ñeñt pañerrpa' atto ya'ye'chochtateññañ Yompor, po'poññapa' o'chcho' alla yeñosatse'terr allohuen pa'namen sosya'tsañ ñeñtara yenamot.

Añpa' ñeñt atet pena eñoteñets ñeñt huetsa e'ñe yañeña yocłapñóñ

¹³ Ñehua, te'pa' o'ch noterrserr po'poñ. Ñerra'm eñall sesho ñeñt otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñt e'ñe cohuenga'acheñ attochacheñenesha'pa' eñochet po'ñoçhepa't eñotuenan ñeñt cohuentetsa Yomporecop. Tarraña ellopa' amachña cha ommono'chatsteto atto e'ñe cohuenga' es p'a'yenet. Tarro'mar ñerra'm po'ñoçh es yeñotenpa' o'ch yeñoch ñaña ñeñt atto es yeña'yen e'ñe cohuenga' ama ommono'chpahuoyaye. ¹⁴ Tarraña ñerra'm sapa' attera nanac sa'tsrre'muena seyoçhro e'ñe sesope'chapreteñof samo'ts ñaña ñerra'm aña sema'yoçhrena ñeñt e'ñe socpa ñeñtepñapa' ama pocteyaye o'ch sommo'chena atto es señotyeneñ mamesha'tets. Tarro'mar ñerra'm ñeñta atarr

* **3:12** Po'ñoçh arrpa' añ toma'ntatanet higoch ñaña uva ñaña aceituna tarro'mar ñeñt chopuets Palestino. Ñeñtpa' atet oten: “Ñerra'm yenare't higochpa' amach pue'mer panoña ñaña aceituna, amapa' ñerra'm yenare't uvachpa' amach pue'mer panoña ñaña higo.”

yommo'chatene'pa' ñeñ̄tpa' attaca'yeña yeshquën.
 15 Tarro'mar ñeñ̄t atet eñoteñetspa' ama arroñeye' hueno Yomporeshot. Ñeñ̄tpa' arroña huena e'ñe ya yoctaþñoñ ñeñ̄t patso'marecpa. Ñama ñeñ̄t atet eñoteñetspa' arroña huena e'ñe oneñet poctaþñoñ.
 16 Tarro'mar ñerra'm ñchocma ya'tsrre'muena yesope'chapreteñoñ yamo'ts amapa' ñerra'm aña yema'yoçhrena ñeñ̄t e'ñe yocpa, ñeñ̄tpa' allot huenaña e'moñetanna'teñets, ñama allohuen sosya'tsañeçhno.

Atet pena eñoteñets ñeñ̄t huetsa Yomporeshot

17 Tarraña ñerra'm po'ñoçh Yompor eñotañ yepene'pa' ñeñ̄tpa' atetcha' yepena: Ñanompa' o'ch yesuanom allohuen sosya'tsañeçhno ñeñ̄t ama pocteye' enteno Yompor, ñama amach allo'na atarr atsrre'mochen yenteno, ñama e'ñech cohuen yentueñ allohuen yamo'tsesha', amachña ñcha po'poñ yentueno. Ñama ñerra'm po'ñoçh Yompor eñotañ yepene'pa' ñchochña ya'muerañtena, ñama e'ñech cohuenare' es yorrtatyen yamo'tseshacop, ñama ñerra'm erroñen yotenpa' e'ñech po'ñoçh atet yepena, amachña ñcha yeshcare'tanneno.
 18 Ñeñ̄tña ma'yoçhrenaya attoch e'ñe cohuen yentannenapa' ñeñ̄tpa' aña muenen o'ch etsotan attoch allohueneypa' o'ch yeþohuerra ñeñ̄t atet pocte' enten Yompor.

4

*Ñeñ̄t coshatse'tyenaya ñeñ̄t patso'marecpapa'
 ñeñ̄tña e'moñetene' ñeñ̄t cohuentetsa Yomporecop*

¹ Ñehua, te'pa' o'ch yocłape'ch po'poñ attoch señoch erroffe' huenaña e'moñe'tanna'teñets ñañma orroteñets ñeññít chocma orrtatyenet sesho. Ñehua, ñeññpa' arrot huena e'ñe sa seye'chapretanna'teñot pa'namen ñeññña quellara'yetsaña seyoçhro. ² Tarro'mar ñerra'm erroñeno nanac es yeje'chapretena, ñerra'm yapa' ama yecheñepa' o'chchó' ñeññ'o'mara yemtsanna'ta. Ñañma ñerra'm esempo es yesope'chapreten, ñerra'm yapa' ama yecheñepa' o'chchó' ñeññ'o'mara yorrota, amapa' o'chchó' ñeññ'o'mara yeçllaranna'ta. Ñehua, yapa' añot ama yecheno ñeññ nanac yemna'yen, tarro'mar ama añ yenamueno Yompor. ³ Ñato' ama'tcha' es yenamña' amach yagape, tarro'mar ñato' añecpach es yenamueñ ñeññ ama pocteyaye ñocop. Tarro'mar ñato' añecpach es yenamueñ attoch yañapa' o'ch nanac es yocshatse'tyena allo. ⁴ Ñehua, ahuañapa' soten ahuo'ch same'ñera Cristo, tarraña te'ñapa' aña socshatse'tyena po'poñ. Ama't señoteñe ñeññ coshatse'tyenaya ñeññ patso'marecpapa' ñeññña e'moñe'tene' ñeññ cohuentetsa Yomporecop. Ñeññ'o'marña ñerra'm yapa'cho' o'ch alla yocshatse'terra ñeññ patso'marecpapa' o'chchó' alla ye'moñe'ter yama Yompor. ⁵ Ñeññpa' ama orrena otено Yompor po'ñoñ ñeññ aquellcareñ ahuatoteñ, ñeññpa' atet otен. "Yompor Puecamquëñ ñeññ chorrateña ñapa' e'ñe puemorrenteñoteypa' nanac mopa'teney." ⁶ Ñeññ'o'marña Yomporpa' chocmach mueneñ o'ch ahuamencañ p'a'y

attoch amach alla yepsere ña. Ñeñto'mar ama't Yompor po'ñoñopa' e'ñe anuareñ ahuatoñeñ ñeñtpa' atet oten: "Yomporpa' amach errotenot yenpano ñeñt e'ñe cohuen entetsa ñañeña, amachña Yomporeye' ame'ñeno. Ñeñto'marña Yomporpa' añach nanac yenpuen ñeñt e'ñe pueñmañesha' ame'ñenaya ña." ⁷ Ñeñto'marña sapa' chocmach e'ñe cohuen same'ñeña Yompor. Añcha'ña sañpare't oneñet tarro'mar ñerra'm atetcha' seþapa', oneñetpa' queçhp'a'nerrescha'. ⁸ Ñeñto'marña o'ch alla separrocmaterr epas Yompor. Tarro'mar ñapa' chocmach alla aguérres. Te'pa' ama't o'te' seþohua ñeñt ama cohuenayaye Yomporecoppa' te'pa' añ poctetsa o'ch alla soctape'cherr cohuen attoch Yomporpa' o'ch alla enterres e'ñe cohuen. Tarro'mar sapa' ama't semneñeñ o'ch semorrentera Yomporpa', tarraña chocma semorrentena ñaña ñeñt patso'marecpa. Ñeñto'marña te'pa' aña poctetsa o'ch sa'ypo'ña'huerr sosya'tsañ ñeñt seyoçhro'tsen. ⁹ E'ñe sañpare'teñot Yomporpa' chosa llequërrtsa. E'ñe sellquëñoñpa' seyahuepa'ch. Ñaña amach allo'na seche'tatsetneno, chocña seyahua. Ñaña amach allo'na nanac es socshatse'tneno, chocña sellca. ¹⁰ Ñaña o'ch sa'meterr so'chñar Yomporesho attoch Yomporpa' o'ch alla tantaterres.

Atto ama atompare'tpahuo yamo'ts

¹¹ Masheñneshacha' ñaña noçhaneshacha' amach sesasare'tanna'tatsto. Tarro'mar ñerra'm esesha' sasare'tene' pamo'ts, amapa' ñeñt tompare'tene' pamo'tspa' po'ñoçhpa' o'

achm̄are'tan ñam̄a Yompor po'ñōñ ñeñ̄t atet anaret. (Tarro'mar Yompor po'ñōñ ñeñ̄t atet anaretpa' atet oten, yemorrentanna'tepa'ch allohuene.) Tarro'mar ñetpa' chach otenapuetañ Yompor po'ñōñ ñeñ̄t atet anaretpa' ñato' amate' es sherbeno. Tarraña ñerra'm esempo atet yepenapa' chach yottena ñerra'mrrate' yañeña e'ñe es eñotuets. Tarraña ñeñ̄tpa' ama atteyaye. Añña pocte' chocmach yame'ñya Yompor po'ñōñ ñeñ̄t atet anuaret. ¹² Tarraña yapa' yeñoteñ e'ñe puesheñarra ñeñ̄t nene' añ ñoñets ñeñ̄tara Yompor ñeñ̄t e'ñe po'ñōch es eñotets. Ñeñ̄tara Yompor ñeñ̄t eñotene' ñeñ̄tcha' allpon a'queshp̄aterr, ñam̄a ñeñ̄tcha' allpon chenquërrtsa. Eso'mare'tña sañapa' chafe' sotenapañ ñato' e'ñech sañeña eñote' ñeñ̄t ama cohuenayayeacheñ.

Atto ama eñotpahuo ñeñ̄tcha' yetantoya tsapatonet

¹³ Te'pa' o'ch notas ñam̄a po'poñoneñ. O'ch se'mñoten ñeñ̄tes atet otets: "Te'ch amapa' ñato' tsapatcha' o'ch ahuen bačhayo po'poñ anetso, allcha' netaruasena' paterr char attoch negana shonte' quelle." ¹⁴ Tarraña ama't atet soteneñpa' amaña señoteñeña ñato' escha' setantoya tsapatonet. Tarro'mar añ patsropa' e'ñe mamecpa yocrrena. Atto yocrrena arr mame' añ patsropa' e'ñe attey ñerra'mrrate' os ñeñ̄t yenta'muene'tahuatcma chach rrema'chen e'ñe patso. O'chñña enome'ta'muen atsne'pa' o'ch huañerr. ¹⁵ Ñeñ̄to'mar aña pocte' o'ch soten atet: "Ñerra'm Yomporcha' muenatspa' a'natnepa' attoch neþa'yes ñeñ̄t atet noctape'chen."

¹⁶ Tarraña sapa' ama atteye'ña sepeno. Ñeñtapa' attachña pa'namen sotyen e'ñe sommo'cheño. Tarraña ñeñt atto yommo'chyenapa' ñeñtpa' ama cohuenayaye. ¹⁷ Ñeñto'marña ellopa' o'ch alla noterrserr: Ñerra'm esempo yeñoteñ yeyočhro ñeñt cohuentetsa Yomporecop, ñerra'm amaña ateñ yeþopa' ñeñtpa' ñeñtña yo'chñar yepen.

5

Ñeñt atet otan eþllayoretnesha'

¹ Te'pa' o'ch se'mñoten ñeñtes nanac eþllayoretes. Te'pa' e'ñe seya'chpeñesha'pa' serranare'ta tarro'mar po'ñočh chocma eñall ñeñtcha' sehuapoya esempo ñeñtcha' semueročhtate'. ² Ama't te'pa' o' atta puetsana'tuen sechecom. Sapa' ñeñtaña atarr semorrentena. Ñama ñeñt nanac cočhnesha' ñeñt sechorra'yenapa' o' atta pompere'chua. ³ Ñama ama't te' seþllayorpa' o' atta chomatlle'chuen. Te'pa' ama es sherbeno. Yeñoteñ e'ñe puechmatlle'cheño seþllayorpa' ñeñtcha'ña se'nuerre' samña sechets esempohuañen ateñ ñerra'mrrate' achamaretes tso. Te'ña ama't o' mellapoterrmochapa' sañapa' allo'na seshonta'huanen seþllayorpa'. ⁴ Ñama te' ñeñt atta setaruasatyese't ñeñt ama setsa'tyese'tepa' te'ña ñetpa' puellquëñoñetpa' nanac eñenet socop. Ñeñto'marña te' Yompor ñeñt nanac Paretspa' e'muenanet ñeñt ateñ pueya'chpeñesha' chocma eñenet socop. ⁵ Ñama sa aña patsropa' esocmañen sechen ama es sepallteno ama't

mamesha. Ñeñto'marña ñerra'm errotencho' nanac cohuen sentenpa' atetcha'cho' sepena. Chach sottena ñerra'mrrate' chañcho ñeñt nanac errataret attoch nanac ota'. Ñerra'm o'chña nanac esoya'tpa' allempoñapa' o'ch muetset. Sapa'cho'ña atetcha' perres samā Yompor esempohuañencha' huerra. ⁶ Tarro'mar sapa' chocma semueročhtatyeñ acheñ ñeñt ama es yečhcatetso attachña sapa' semtsatyenanet. Ñama ñetpa' amach errotenoñ a'queshpáateto ñañeñeta allempo sapa' soteñe'chenanet.

*Atto ama amuenme'chpahuo cohuame'te'
Cristo*

⁷ Ñeñto'marña masheñneshacha' ñama nočhaneshacha' o'ch notas, chocmach e'ñe sa'huanta'huanom ñeñt echarr sentyen, attoch secuame'ch Yepartseshar Cristo esempohuañencha' huerra. Atetcha' sepa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' chocmach ñanom yecuen esempohuañencha' huapotyena esheccha' e'ñech cohuen es yečhcatsa ñeñt nanac yemorrentyena. ⁸ Ñeñto'marña sapa'cho'ña chocmach es sa'huanten. Amach semuenme'chatsche tarro'mar o' mameshamerrapa' o'ch huerra Yepartseshar. ⁹ Masheñneshacha' ñama nočhaneshacha' amach setanmare'tanna'tatsto, attoch Yompor ñeñt e'ñe es eñotetspa' amach otteñe'chuerrsso samā ñerra'm esempoch huerra. Tarro'mar Yomporpa' o' allanermoch. ¹⁰ O'ch masheñneshacha' ñama nočhaneshacha' sočtage'ch ñeñt atet pa'yeset ahuañt ñeñt a'mta'yesayet Yompor po'ñoñ.

Tarro'mar ñetpa' nanac ahuantete't atto nanac amueročhtatarettete't. Ñeñ̄o'marña sapa'čho'ña atetcha' sepa' samña. ¹¹ Po'ñočhp'a' yeñoteñ ñeñ̄t nanac ahuantene' mueročhteñetspa' ñeñ̄tp'a' nanaccha' cosheñtso'tsen. Ama't sapa' señotueñ ñeñ̄t atet pa ahuañ Job. Ñapa' nanac ahuantan topateñets. Ñañ̄a sapa' e'ñe señotueñ ñeñ̄t atet poñ Yompor. Allemo mueročhetua Job Yomporñapa' alla apuer esocmañen attoch eñoch Yomporpa' nanac amueraña.

¹² Ñeñ̄o'marña sa masheññeshacha' ñañ̄a nočhaneshacha' añ̄ pocte' sapa'čho'ña añ̄cha' ñanom sequečhp'a'hua. Ama't e'ñe erra'tsena pa'so'chñopa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chñó, ñañ̄a amach sotatsto o'ch sena' señoñ Yompor po'patseñ pa'so'chñó. Añ̄cha'ña ñerra'm esempo e'ñe pocte' es sentenpa' attach sanap: "Atette'ca'ye." Ñañ̄a ñerra'm esempo ama es pocte' sentenopa' attach sanap: "Ama atteyaye." Allotp'a' ñeñ̄tach. Allochñapa' amach eñalle attoch otteñe'chuerres Yompor.

Añ̄ pocte' chocmach yema'yocham̄psannena

¹³ Añ̄ña ñeñ̄t poctetsa ñeñ̄tcha' atet sepa. Ñerra'm erra'tsenotes mueročhtatsapa' čochñia sema'yocha. Ñañ̄a ñerra'm esesha' e'ñe coshetsapa' e'ñe pocte' morrechetepa' allo ya'ye'chočhtateñ Yompor. ¹⁴ Ñañ̄a ñerra'm eseshas atsna'tetspa' añ̄ pocte' o'ch sagotach ñeñ̄t pompornesha' pen ñeñ̄t ame'ñetsa, attochña ñetcha' ma'yocham̄pset atsnañet. Allotp'a'

e'ñe puechore'teñotet Yomporpa' noñetepa' coñét es puese' atsnañetesho. ¹⁵ Ñerra'm e'ñe pueyemteñotet Yompor ma'yochetpa' atsnañetñapa' correrrach. Tarro'mar Yomporpa' ñach ahuamencañ perre'. Ñama ñerra'm añ o' pohua ñeñt ama pocteyayepa' allempo Yomporpa' o'ch alla peretnerrñañ po'chñar. ¹⁶ Ñeñto'marña añ pocte' o'ch sa'meta'huerr allohuenes so'chñar. Allochñapa' chocmach sema'yochamñpsannena attoch socrrerra e'ñe cohuen. Ñama ama't erra'tsenaacheñer ñerra'm e'ñe cohuen cotape'chen Yomporecop ñama ñerra'm e'ñe pueyočhrocmañen ma'yochetpa' atetña e'mñotenña Yompor. ¹⁷ Ateñ pa ahuañ Elías ñeñt a'mitäyeñt Yompor po'ñoñ. Ñeññia Elías ama't atta ñerra'm ya ñeñtey arromñañey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñama meterrerr pechapñia arrorr ama huateno. ¹⁸ Allempoñapa' o' alla ma'yocherrerr attoch enamuerran Yompor huaterrepa'. Allempoñapa' o' alla huaterra, ñama allempopa' o' alla choparesyerr narmetsočhno.

¹⁹ Masheññeshacha' ñama nočhanesha ñerra'm sa puešheñarroñes o'ch alla sepuerrerra ñeñtes te'pa' cotene' cohuen Yompor po'ñoñ, tarraña ñerra'm esesha'ña alla soctape'chaterre' e'ñe cohuenpa' ²⁰ sapa' señochepe'a'ch ñeñt atet cotape'chatets e'ñe cohuenpa' choch a'queshpatenan pamo'ts puecamquëñ ñeñt atarr ochñañ ñama choch peretnateññañ allohuenshonte' po'chñar. Te'pa' ñeñtach notas. Allohua.

SANTIAGO 5:20

xxiii

SANTIAGO 5:20

Santiago

**Yompor Po'ñoñ ñeñf attō Yepartseshar
Jesucristo e'ñe etserra a'poctaterrnay
Yomporesho**

New Testament in Yanesha' (PE:ame:Yanesha')

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fa985bb4-fad0-5968-9ee4-626b89cba24f